

Headlines

- 1 प्रधानमंत्री नरेंद्र मोदी होंरें आखेआ ऐ जे दक्खण चीन सागर च अमन शांति, सुरक्षा ते स्थिरता कायम होना समूलचे भारत प्रशांत क्षेत्र दे हिते च ऐ।
- 2 जम्मू-कश्मीर नै जुलाई-अगसत म्हीने सोशल मीडिया सूचकांक च अब्बल कारकदर्दगी कीती ऐ। एदे नै गैर साधारण सोशल मीडिया भागीदारी ते आउटरीच कोशशें दा पता लगदा ऐ।
- 3 बीएसएफ दे अधिकारियें आखेआ ऐ जे नियंत्रण रेखा दे पार तकरीबन डेढ सौ आतंकवादी घुसपैठ करने दा इंतजार करा करदे न।
- 4 जम्मू-कश्मीर प्रशासन नै अज्ज जम्मू-कश्मीर पुलिस गजटड सेवा लेई भर्ती सरबन्धी नमें नियम लागू कीते न।

<><><><><><>

PM-East Asia Summit

प्रधानमंत्री नरेंद्र मोदी होंरें इक्कमुक्त, खुल्ले-डुल्ले, समावेशी, खुशहाल ते नियम आधारित हिंद प्रशांत क्षेत्र दे महत्व पर जोर पाया ऐ। उनें आखेआ ऐ जे नियम आधारित हिंद प्रशांत क्षेत्र पूरे इलाके दी अमन-शांति ते प्रगति लेई महत्वै आहला ऐ। उनें आखेआ जे दक्खण चीन सागर क्षेत्र दी अमन-शांति, सुरक्षा ते स्थिरता पूरे हिंद-प्रशांत इलाके दे हितै च होग। प्रधानमंत्री होंर अज्ज लाओ पीपुल्स डेमोक्रेटिक रिपब्लिक दे वियंनयन च लग्गे दे 19में पूर्वीएशिया शिखर सम्मेलन च भाषण देआ करदे हे। दुनिया दे बक्ख-बक्ख खेत्तरे च एल्ले चला करदे हिंसक संघर्षे पर चैत प्रगट करदे होई मोदी होंरें आखेआ जे स्थाइवा नजरिया विस्तारवाद दी थार विकासवाद दा होना लोडचदा ऐ। उनें आखेआ जे इनें संघर्षे दा ग्लोबल साउथ दे मुल्ले पर माडा असर पवा करदा ऐ। उनें आखेआ जे हर कोई चाहंदा ऐ जे पश्चिमी एशिया क्षेत्र च शांति ते स्थिरता बहाल होयै। मोदी होंरें एह गल्ल परतियै आक्खी जे एह युद्ध दा युग नेई ऐ ते समस्याएं दा नबेडा युद्ध दे क्षेत्र च नेई होई सकदा।

<><><><><><>

Modi-Sisoullth Meet

प्रधानमंत्री नरेंद्र मोदी होंरें अज्ज वियंनयन च लाओ पीपुल्स डेमोक्रेटिक रिपब्लिक दे राष्ट्रपति ते लाओ पीपुल्स रेवूलुशनरी पार्टी दी केंद्री कमेटी दे महासचिव एच.ई थोंगलोन सिसोलिथ हुं दे कन्नै मुलाकात कीती ऐ। प्रधानमंत्री मोदी होंरें राष्ट्रपति सिसोथि होंरें गी आसियान शिखर सम्मेलन ते पूर्वी एशिया शिखर सम्मेलन दी कामयाबी कन्नै मेजबानी करने पर ममारखां दित्तियां। दौनें लीडरें आपूं'चै दे रिश्ते पर सोच-विचार कीता ते नेडमीं भ्याली गी होंर मजबूत करने लेई अपने धेइयै गी फही पक्का कीता। उनें सांस्कृतिक आदान-प्रदान, विरासत गी परतियै बहाल करने ते विकास दे क्षेत्र च दौनें मुल्ले बशकार भ्याली पर संदोख प्रगट कीता। राष्ट्रपति सिसोलिथ होंरें लाओ पीपुल्स डेमोक्रेटिक रिपब्लिक गी हाड ते तूफान च भारत आस्सेया मनुक्खी सहायता देने पर प्रधानमंत्री हुंदा धन्नवाद कीता। प्रधानमंत्री होंरें भारत-आसियान मुल्ले दे रिश्ते गी मजबूत करने लेई लाओस दे समर्थ लेई प्रधानमंत्री हुंदा धन्नवाद कीता।

<><><><><><>

SVEEP-JK

जम्मू-कश्मीर नै जुलाई-अगसत म्हीने सोशल मीडिया सूचकांक च अब्बल कारकदर्दगी कीती ऐ। एदे नै गैर साधारण सोशल मीडिया भागीदारी ते आउटरीच कोशशें दा पता लगदा ऐ। एह उपलब्धि 15एं राज्यें ते केंद्र शासित प्रदेशें दे मुख चुनां अधिकारियें दी सोशल मीडिया टीमें राएं दित्ते गेदे आंकड़ें उप्पर आधारित ऐ। जम्मू-कश्मीर दे इस दर्जेबंदी च अब्बल तौर पर उभरने कन्नै एहदी प्रभावी ते गतिशील सोशल मीडिया रणनीति दा प्रदर्शन हुंदा ऐ। लक्षित अभियानें, यूजर आस्सेया तैयार कीती गेदी समग्री यू.जी.सी ते चला'रदियें डिजिटल पैहलकदमिं दे इस्तेमाल कन्नै एह खेत्तर बाकियें आस्तै उदाहरण बनी गेआ ऐ। जम्मू-कश्मीर दी डिजिटल रणनीति प्रमुख प्राथमिकता, जियां के स्पेशल सम्मरी रिविजन एस.एस.आर ते बक्ख-बक्ख चुनां जागरूकता अभियानें दे अनुरूप ऐ।

<><><><><><>

Jasrotia-Election

जसरोटा चुनाव हल्के थमां नमें चुने गेदे बीजेपी विधायक राजीव जसरोटिया होरें मीडिया गी संबोधित करदे होई जम्मू-कश्मीर दे लोकें दा उनेंगी ते उंदी पार्टी गी समर्थन देने आस्तै धन्नवाद कीता। उनें आखेआ जे जम्मू-कश्मीर दे लोकें प्रधानमंत्री नरेंद्र मोदी हुंदी नीतियें दे कारण गै बीजेपी गी वोट दित्ता ऐ जेदे करी पार्टी नै 29 सीटां जित्तियां ना। उनें आखेआ जे बशक कश्मीर खित्ते च बीजेपी नै कोई सीट नेई हासल कीती, पर पार्टी नै उत्थे वोट बैंक आस्तै इक्क मजबूत आधार बनाया ऐ। राजीव जसरोटिया होरें आखेआ जे बीजेपी इक्क भारत, कट्टा भारत ते एकीकृत भारत दे नां उप्पर चुनाव लडदी ऐ। उनें गलाया जे नेशनल कांफ्रेंस नै हुन बहुमत हासल कीता ऐ ते हुन इंदी जिम्मेदारी ऐ जे आम जनता आस्तै अपनी बचनबद्धता दे मताबक अपने वादे पूरे करना। उंदे मताबक कश्मीर घाटी च बीजेपी किश गै वोटें कन्नै अपना खाता खोलने थमां रेई गेई ऐ पर फही बी पार्टी नै उत्थे खरे मते वोट हासल कीते न जेडे इस गल्ल गी दर्शादे न जे प्रधानमंत्री नरेंद्र मोदी हुंदे कम्मं कन्ने कश्मीरी लोक खुश ना। उनें कठुआ दे लोकें दा 5 सीटां बीजेपी गी हासल करोआने आस्तै धन्नवाद कीता।

<><><><><><>

AAP NC

अरविंद केजरीवाल हुंदी अगुवाई आहली आम आदमी पार्टी नै अज्ज अधिकारिक तौर पर जम्मू-कश्मीर च नेशनल कांफ्रेंस गी समर्थन देने दी घोषणा कीती ऐ। आम आदमी पार्टी नै अज्ज लेफ्टिनेंट गवर्नर हुंदे दफ्तर गी उमर अब्दुल्ला हुंदी अगुवाई आहली सरकार गी समर्थन देने बारै औपचारिक चिट्ठी सौंपी दित्ती ऐ। आम आदमी पार्टी नै डोडा असेंबली हल्के सवां जित्त हासल कीती ही। आप दे मेदवार मेहराज मलिक नै भारतीय जनता पार्टी दे मेदवार गजय सिंह राणा होरें गी 4 ज्हार 538 वोटें कनै हराया हा।

<><><><><><>

LG-Vaishno Devi

जम्मू-कश्मीर दे लेफ्टिनेंट गवर्नर मनोज सिन्हा होरें अज्ज त्रिकुटा पर्वत उप्पर स्थित श्री माता वैष्णो देवी मंदर च मत्था टेकेया। अपने दौरे दरान उनें सब्बनें दी खुशहाली, शांति ते समृद्धि आस्तै मत्था टेकेआ। दुर्गा पूजा दे पावन ध्याड़े उप्पर उनें जम्मू-कश्मीर दे लोकें दी सुख-समृद्धि लेई बी कामना कीती। एहू जानकारी लेफ्टिनेंट गवर्नर हुंदे दफ्तर दे सोशल मीडिया अकाउंट 'एक्स' थमां मिली।

<><><><><><>

BSF-LoC

नियंत्रण रेखा दे कोल तकरीबन 150 आतंकवादी कश्मीर घाटी च घुसपैठ करने दी फिराक च न, पर सुरक्षा बलें उंदी कोश्ट नाकाम करी देडन। बीएसएफ कश्मीर दे इंस्पेक्टर जनरल अशोक यादव हुंदे आस्सेया दित्ती गेदी जानकारी मुजब इनें आतंकवादियें दी घुसपैठ दी कोश्ट जारी ऐ। उनें आखेआ जे बक्ख-बक्ख एजेंसिएं थमां थ्होने आहले खुफिया जानकारी दे आधार उप्पर अस्स सेना गी बन्ने उप्पर तैनात करने दी योजना बना'रदे आं।

<><><><><><>

Recruitment-Guidelines JK

जम्मू-कश्मीर प्रशासन नै अज्ज जम्मू-कश्मीर पुलस सेवा लेई भर्ती सरबन्धी नमें नियमें दी शुरूआत कीती ऐ। एहू नियम इक्क सरकारी अधिसूचना राएं अमल च आई गेना। एहदे कन्नै पुलस दे अधिकारियें दी भर्ती प्रक्रिया च महत्वै आहले बदलाव आई जाडन। अधिसूचना मुजब भर्ती सिद्धी नियुक्तियें ते प्रमोशन राएं कीती जाग। जम्मू-कश्मीर लोक सेवा कमीशन सिद्धी भर्ती दा कम्मकाज संभालग जदके प्रमोशन सरबन्धी प्रक्रिया गी मैहकमे दी प्रमोशन मुतल्लक कमेटी दिक्खग। नमें दिशा-निर्देश सेवा कैडर जेदे च जनरल, दूर संचार, मंत्रालय, रटैनोग्राफर, फोटोग्राफी, पुलिस ट्रांसपोर्ट सरबन्धी वर्कशाप ते हथियार असले सरबन्धी सरिस्ते च लागू होडन। मुख्व सचिव ते पुलस दे महानिदेशक समेत दऊं सीनियर अधिकारियें दी अगुवाई आहली दऊं कमेटियां मैहकमे च प्रमोशन ते नियुक्तियें दे कम्म गी दिक्खने लेई कायम कीतियां गेइयां ना।

<><><><><><>

Girl-Child Poonch

कुडियें सरबन्धी अंतरराष्ट्री बालिका दिवस दे मौके पर पुंछ च समाज कल्याण मैहकमे ते जिले च कनूनी सेवाएं मुतल्लक प्राधिकरण नै इक्क जागरूकता प्रोग्राम लोआया। इस प्रोग्राम दा सरिस्ता दीनानाथ मेमोरियल गर्ल्ज हायर सेकेंडरी स्कूल च कीता गेआ। इस

प्रोग्राम दा मकसद कुडियें गी उपलब्धस मौके ते अधिकारें बारै जागरूकता फैलाना, लैकिक बरोबरी गी बढ़ावा देना ते नोजवान कुडियें गी अपना भविष्य बनाने लेई बाख्तयार करना ऐ। स्हाडे पुंछ दे जिला संवाददाता अनुभव मिसरी हुंदे कन्नै गल्लबात करदे होई कनूनी सहायता सरबन्धी डिफेंस कौंसल दे भानू प्रताप होरें आखेआ।

<><><><><><>

Girl-Child Day Samba

जम्मू-कश्मीर कनूनी सेवा प्राधिकरण दे संरक्षण च ते जिला कनूनी सेवा प्राधिकरण साम्बा दे चेयरपर्सन उंदे निर्देशें हेठ अज्ज साम्बा दे कैप्टन ध्रुव सिंह मेमोरियल गौरमैट गर्ल्ज मॉडल हायर सेकेंडरी स्कूल च बाल विकास कमेटी कन्नै मिलियै अंतरराष्ट्री बालिका दिवस दी जागरूकता बारै कार्यक्रम रक्खेआ। एह कार्यक्रम डी.एल.एस.ए साम्बा दे चेयरमैन रविंद्र नाथ बट्टल होरें डी.एल.एस.ए दे सचिव संदीप सिंह सेन हुंदी अगुवाई च करोआया। स्हाडे जिला संवाददाता सतपाल शर्मा हुंदे कन्नै गल्ल करदे होई संदीप सिंह सेन होरें आखेआ।

<><><><><><>

Weather-JK

श्रीनगर दे मौसम विभाग केंद्र नै अज्ज 16 ते 17 अक्तूबर गी जम्मू-कश्मीर दे उच्चि थाहरें पर हल्की बर्फ पौने दे आसार दस्से ना। मौसम अधिकारी मताबक 15 अक्तूबर तगर मौसम खुशक रौहग ते 16 या 17 अक्तूबर थमां जम्मू ते कश्मीर दी किश-किश थाहरें पर हल्की बरखा होने दे असार ना। 18 ते 19 अक्तूबर थमां कश्मीर खित्ते च बढ़ल रौहडन ते किश-किश थाहरें पर हल्की बरखा बी होई सकदी ऐ। मौसम सरबन्धी अधिकारी दी जानकारी मूजब इत्थूं दी उच्चि थाहरें उप्पर हल्की बर्फ ते किश टामीं-टामीं थाहरें पर तेज हवा बी चलने दे असार ना।

<><><><><><>

IAF-UWM Rally

भारती वायु सेना दी उत्तराखंड वार मेमोरियल ऐतिहासिकार रैली श्रीनगर पुज्जी गई ऐ। उत्तराखंड वॉर मेमोरियल दे अध्यक्ष तरूण विजय ते श्रीनगर हवाई ठकाने दे स्टेशन कमांडर, एयर कमांडर प्रभात मलिक होरें इस रैली दा सुआगत कीता। कमांडर विजय प्रकाश भट्ट होरें इस रैली दी अगुवाई कीती। अपने चाल्ली दी पैहली एह रैली 7 ज्हार किलोमीटर दा सुर तैय करदे होई सियाचिन एयरबेस सवां शुरू होई ही, एह अरूणाचल प्रदेश ते तवांग चा निकलदे होई नवंबर म्हीने दे बश्कार दिल्ली च समाप्त होगा। लेई च लद्दाख दे लेफ्टिनेंट गवर्नर ब्रिगेडियर बी.डी मिश्रा ते ज्हारां बद्दे लद्दाखी नौजवानें इस रैली गी जबरदस्त तरीके कन्नै बरदाया। इस्सै चाल्ली दी तैयारी श्रीनगर च बी कीती गेदी ऐ। इस रैली दा मकसद नौजवानें गी भारतीय वायु सेना च शामिल होने लेई प्रेरित करना ऐ।

<><><><><><>